

Inuiaqatigiinnik imminut napatittunik namminersulivissimasunillu ineriartortitsinermi peqataasussat Meerartatta inuusuttattalu nammineersinnaallutik perornissasa qanoq angunissaa pillugu apeqquteqaat allaavigalugu oqallinnissamik siunnersuut
(Inatsisartunut ilaasortaq Jørgen-Ole Nyboe Nielsen, Demokraatit)

Akissuteqaat

(Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoq)

Angajoqqaat ilinniartitsisullu inissisimanerat aamma meeqqat inuusuttullu inuiaqatigiinni imminnut napatillutillu namminersortuni peroriartornissaat pillugu apeqqummut qujanaq.

Naalackersuisut angajoqqaat ilinniartitsisullu inissisimanerat pillugu siunnersuuteqartup tunngavilersuutai isumaqatigaat. Ilaatigut Meeqqanut Inuusuttunullu Periusissiami angajoqqaat ilaqutariillu, annermillu ilaqutariit immikkut pisariaqartitsisut tapersernissaat pingaartinneqaaq. Saniatigut sulii atualinngitsut atuarfillu pillugit inatsisissatut siunnersuutini perorsaatut ilinniartitsisullu meeqqat inuusuttullu pillugit Naalackersuisut periusissiaannik piviusunngortitsisinnaanissaat ilanngullugu eqqarsaatigineqarpoq.

Meeqqanut Inuusuttunullu Periusissiap malitseqartinnerata ilaatut 2012-imi suliniutit arlallit taperserneqarlutillu aallartinneqarput, ataatsimut isigalugu meeqqat ukiui apeqqutaatillugit siusissukkat suliniutinik annertusaanissamik siunertaqartut. Tassani ilaatigut pineqarput PAARISA-p suliniutaata ”Ilaqutariinnut naartusortalinnut siusissumik iliuseqarnerup” inerisarneqarluni nangingneqarnera. Kommuni ilaqutariinnik sullissiviit, taakkunanilu suliaasut annertusarneqarlutillu siammaannerat, aammalu assersuutigalugu Meeqerivitsialaap siusissukkat aallarnisartarfinngornissaanut naleqqiullugu.

Siusissumik suliniuteqarnerup annermik angajoqqaat meeqqallu akornanni peqqissumik attaveqatigiinnissaq qularnaassavaa, meeqqap toqqissisimasumik tarnikkullu peqqilluni peroriartornissaa ikorfartorlugu, ilaatigullu piffissap ingerlanerani angerlarsimaffiup avataanut inissiisarnerit pissarsiaqartinneqalersarnerat annikillissassallugu. Aamma atualinnginnermi kaammattuinnikkut isumassuinnikkullu meeqqat ilikkagaqarnissamat inooqataanermullu piareersimanerat annertusassallugu, tamannalumi aamma atuartitsissutini inuttut inerikkiartornermi aamma upperisalerinnermi isumalioqqissaarnermilu siunertaavoq. Tamakku ataatsimut meeqqat tamarmik ineriartorluarlutik, peqqillutik toqqissisimallutillu inuunissamat periarfississavaat.

Ilinniartitsinermut Pilersaarut II, Naalackersuisut Ilinniartitsinermut Periusissiaata malitsigisaatut suliarineqaleruttorpoq, tassanilu suleqatigiissitat assigiinngitsut 14-it siunnersuusiortussaapput inuiaqatigiinnut imminnut napatillutillu namminersortunut naleqqiullugu, aamma ilaatigut meeqqanut inuusuttunullu immikkut suliniutit nassataannik ilinniakkatigut pisariaqartitanut naleqqiullugu, tamatumattaq nassatarissavaa ilinniakkat aaqqissugaanerisa pisariaqarfiatigut naleqqussarneqarnissaat.

Siunnersuuteqartutulli Naalackersuisut soqutigilluinnarpaat, meeqqat atuarnertik ingerlaqqinnertillu pitsaanerpaamik naamassisassagaat, tamatigullumi toqqissisimallutik imminnullu napatillutik innuttaaqataalernissaat, tamatumalu angujartuaarnerani pitsaanerpaamik tapersorneqarlutillu ikorfartorneqarnissaat – angajoqqaaminnit inersimasunillu allanit, taamaammat oqaaseqartussat saqqummiukkumaagaat Naalackersuisuniit qilanaarivagut.

Taama oqaaseqarluta Naalackersuisuniit partiit oqallilluarnissaannik kissaappagut.